

Vun driveriver

erscheint auf www.lenauheim.de

monatliche
Erscheinung

Dezember 2014

von Helen Alba

De Ota un de Esel

Die Engelskinner ware beim Ota un der Oma uf Bsuch. Die Oma hat grad vill Arweit ghat, do hat de Ota mit de Kiner misse uf die Hutwed spille gehn, dass Ruh im Haus is. Sie han schun e gudi Weil gspilt, uf eemol gsiehn se dort e Viech stehn. Sie bewunnre des Viech un menne, des is e Ross. De Ota saar: „Nee Kiner, des is e Esel“!

Die Kiner bewunnre de Esel un menne sogar, weil der aa eemol gschrie hat, dass der so rede tut. So wars uf eemol rum mit dere Spillerei, alli wille se nor hem, for der Oma verzähle, was se gsiehn han.

Der Erschti ruft schun vun weitem: „Oma, mir han e Esel gsiehn, der was rede kann“! „Jo“, saar der Zweeti, un der war so gross“! Der anri ment: „Jja, bal so gross wie de Ota“. „Sei doch ruhich“, saar der Letschti, „es is gar nit wohr, weil so e grosse Esel wie de Ota is, gits doch gar nit“!

Schun als Kind verkuppelt

Unser alde Ota, de Vetter Franz war im ganze Dorf als Spassvogel bekannt. Kaum war ich acht oder nein Jahr alt, hat er for mich e Bu gsucht, um mich zu verkupple. Do hat mol unser grosse Brunne ausgeputzt gin misse, un des hat immer vun de Sauhalter Buwe eener gemacht. Dass der soll fleissich un schnell arweide, hat de Ota ne immer angetrieb. „Dass wer was: flink, fliessich, so e Bu meeht ich for unser Mari. Schau, mir han e grosses Haus, e Kuh, Ross un Waan. Es Mari is aa fleissich wie du, es kheert die Gass, de Hof, tut de Saustall mischte“.

So hat der Ota gered un der Bu als immer schneller gearweid. Ufmol saar er: „Tut de Mari vleicht nit aa stehle oder lieje“? „Nee, nee“, saar de Ota, „nor es beisst so geere“. Der Bu studiert e Weil, dann saar er: „Nee, wann er beisst, will ich de Mari nit han“. Druf saar de Ota: „Des is jo nor so lang, wies kleen is. Wanns greesser git, tuts bestimmt nimmi beisse“. Der Bu studiert nochmol e Weil, dann saar er: „Nee, will ich de Mari nit han! Weil wann er beisst, wann er kleen is, beisst er aa, wann er gross is“!

Vill Dummheit uf eem Platz

Wann mer so am Fernseher hucke tut un dene Politiker ihre Talkerei verfolcht, kummts em oft zum Fortlaafe. Un mer denkt sich derbei, meiner Seel, e greeßre Bleedsinn hat mer im Lewe noch nit gheert. Es werd dumm um de heisse Brei rum gepappelt un schaut doch nix Gscheits raus. Mir hoffe nor, dass unser Staatspräsident, de Klaus Johannis, Ordnung un Disziplin verschaffe un sich derbei ach dorchsetze kann.

So sitz ich oft un denk, lieber schlofe gehn. Un so han ich mol vor em Inschlofe dran denke misse, was de Vetter Thomasch Hans aus Bogarosch gar oft gsaar hat. Er war langi Johre de Scheefbuchhalter bei der Kollektiv. Un wann so manchi krummi Dinger gedreht gin sin, wann er mitmache hat misse, ohne des zu wille – wie git doch gsaar: mitgefangen, mitgehungen – is em Vetter Hans gar oft de Geduldsfade geriss. Doch weiter wie zu saan: „Sovill Dummheit uf eem Platz han ich meiner Lebtach noch nit gsiehn!“, hat er sich nit getraut.